



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

f Tir Yimyim

ig tir_yimyim

yt tir yimyim

TAPAK 7

Canada PM Mark Carney-i
India semdang

US-Iran jembishinü temogo,
tezüngzüktep mali saka teimla lir

VOL. XXIII ISSUE NO. 136 (ADOK 136) DIMAPUR KÜPTOKNÜ (SATURDAY) TSÜKLAI (FEBRUARY) 28, 2026 ₹ 5.00

Ao-Settsü Village tenüng melentsü

Dimapur, February 27, 2026 (TYO): Mokokchung district nung Ao-Settsü Village nungi Settsü Village ta melentsü atema sangdong ka agütsüogo.

Iba ya Village Council ajanga benok aser Mokokchung District kübok Extra Assistant Commissioner (EAC), Ongpangkong Circle telongtet nung lir ta Mokokchung Deputy Commissioner Ajit Kumar Verma, IAS-i sangdong ka nung ashi.

Yimtsüing tenüng melenshiba nung kija mesüra telok kari danga ashishitep kar lira anogo 30 tsüingda Mokokchung Deputy Commissioner office nung tezüluba nung agütsüsüla ta Mokokchung DC-i February 26, 2026 nü metetdaksüogo.

Anogo 30 tsüingda ashishitep kecha malira 'No Objection' kuli agütsüsü aser sorkar dangi tatembang temelaba atema abentsü ta Mokokchung DC-isa ashi.

KPC-i CM Rio dang journalists asoshi pension scheme tenzüksü nenshir

Dimapur, February 27, 2026 (TYO): Kohima Press Club (KPC)-i Chief Minister Neiphiu Rio dangi shidi ka nung Nagaland nung journalists asoshi pension scheme ka tenzüksü nenshiogo.

Tesüiba nung shidi ka ajanga journalism ya wadang ka ama züngsemtsü takhangba agütsüogo. Nagaland nung journalist asoshi pension scheme tenzüksü ajanga mapa nungi sodi anguba sülen financial security agütsüsü. Iba mapa ya ajanga loktiliba nung Fourth Estate ama tongtipang shilem agiba agizükba mera ka asütsü ta KPC-i ashi.

Nagaland meketa aliba state tem-Assam, Manipur, Arunachal Pradesh, Meghalaya, Mizoram nungbo 1990s nungi pei pei journalists' pension scheme tenzüksü ta parnokisa Chief Minister Rio dang ashi.

Tesüiba mapang tezüluba agütsübatem nung ajemdaker Directorate of Information and Public Relations (DIPR)-ia pension scheme atema tebilemba benogo anungji chief minister-iba ya kanga rongdak ta angateta tekaratiba nung mapa inyaksü mepishir ta KPC-i ashi.

CM Rio-i Nagaland nung press fraternity yaritsü atema maparen balala inyaka aruba atema tenüngsang agütsür. Mapatem rongnung Kohima

nung KPC building ka tang teyangludak lir. Ajisüaka, Nagaland nung media fraternity-i timtem ajuruba onüktem asoshi mapa meinyakra teyari mabensar ta KPC-isa metetdaksüogo.

Külen, Nagaland sorkar kübok accredited journalists nem operational subsidy agütsüba ya mapang shia repringshitsü nüngdaker. Journalist tem ya private sector nung itasen tajemtiba angurtem lir anungji iba inyakyim mapang shia repringshimba ajanga journalists yaritsü ta KPC-isa CM Dr. Rio dang shiogo.

Journalists' Welfare Fund nung working journalists kinungertem dendaktsüsüla ta parnokisa shisem.

Tawa Mokokchung Press Club-i professional journalism aser unregulated media content ajanga public ratadaksüba indang tebilemstü ka lemsatepbaji shitak lir ta Kohima Press Club-isa ashi.

Public-i osangtsüsang angadang mejangjatetba social media contents ajanga parnok anisar aser iba ajanga journalists-i talila awaa oa osangtsüsang bendenba nunga kongshir ta KPC-isa metetdaksüogo.

KPC-isa state sorkari official press conferences aser sentongtem nung inyakyim tajung lateta beshitsü ayongzükogo.

Dimapur Police-i Constable Recruitment indang metetdaksür

Dimapur, February 27, 2026 (TYO): March 2026 tetenzüklen Police Constable (Recruitment) kübok tenüng jateta alirtem interview/Viva-Voce agütsü ta Commissioner of Police, Dimapur-i metetdaksüogo.

Commissioner of Police, Dimapur indang office nung interviews agütsü ta Presiding Officer, District Level Selection Committee (DLSC)-cum-Commissioner of Police, Dimapur-i ashi.

Iba interview ya batch balala

lemsar agütsü aser mezüngbuba batch ji anepdang 9:00 ako nung aser tanabuba batch ji anüngdang 12:00 ako nung agütsü. March 5, 6 aser 7, 2026 anogotem CP Office Conference Hall nung interview agütsü.

Iba dak sendakba osang metetnürtemi I. Meren Chenth, NPS, Member Secretary, DLSC-cum-DCP Traffic- 7085055004 mesüra Temsunochet Changkija, NPS, Co-opt Member DLSC-cum-ADCP (HQ), Dimapur-7085055041 den tongteptsü akok.

Nagaland sorkar tesayurtemi March 2 nungi tuluba lungkak aittsü

Kohima, February 27, 2026 (TYO): Nagaland Government Teachers' Association (NGTA)-i tanü agi anogo anabuba lungkak aitogo aser parnoki March 2 nungi Naga Solidarity Park nung sentong tuluba agütsü metetdaksüogo.

Anogo ananü timi lungkak aitiba Hokolbarnü tembangogo ta NGTA-i ashi. Parnoki anogo tenetnü züngzüksüba sülen anogo ananü pen-down strike aser anogo ananü timi lungkak aitiba sentongtem agiogo.

NGTA-i Directorate of School

Education, Nagaland kübok State Non-Development Expenditure nung parnok itasen dendaktsüsü akhangger.

Iba amaji meinyak tashi parnoki ozüngi melaba ama lungkak aittsü manentsü ta NGTA-i metetdaksüogo.

Directorate of School Education, Nagaland nung sorkar tesayur 2293-i lungkak aitogo. Iba ya kanga nüngdaker kechiyong parnok itasen state indang expenditure framework kübok alitsüsa ta parnoki ashir.

Parnoki aiben shiditem

züluaka aser mapang züngzükjaka sorkari takhangba magizüker aser iba jagi lungkak aitiba ulutsüsa akümer ta NGTA-isa ashi.

March 2 nungi Solidarity Park, Kohima nung lungkak aitiba sentong tuluba agütsü ta parnokisa ashi.

State Account Head kübok itasen agizüksü indang shiditem nguogo aser itemji bangdakpur dangi benogo saka state sorkar mapa inyakeritem Budget Head of Account shimtet tashi mali ta Department-i metetdaksüogo.

Kohima nung school tejentiba rongnung ka jenjang ajungketer



Kohima, February 27, 2026 (TYO): Kohima nung school tejentiba rongnung ka Government Middle School (GMS) Daklane jenjang ajungketogo.

GMS Daklane ya 1954 küm lapok aser küm 72 sülen Government High School (GHS) Daklane kümogo.

Iba sentong nung Women Resource Development and Horticulture Minister Salhouonuo Kruse, School Education & SCERT Advisor Dr. Kekhrielhoulie Yhome, School Education Department ketdangsürtem, lokti lenirtem aser Daklane nung alirtem aden.

"Iba anogo ya colony aser jila atema kanga dang tongtipang lir. Daklane Government School ya 1954 küm lapok aser Kohima nung school tejentiba rongnung ka. 2002 küm Government Middle School jenjang nung ajungketeta liasü" ta Minister Kruse-i ashi.

"Jila tiyongtsü nung school tejentiba rongnung ka asü nung mapang talangka colony nung alirtemi high school kabosa aginüa aruogo" ta lai ashi.

"Sorkar school tem ajanga loktiliba nung tongtipang shilem agir aser ibaji free education agütsüba lir. Iba ajanga senotsü agi timtemba kibongtem ajangzükter. Tsürabur ajak kasa masü, kar takar, kar sensaker

saka sorkar school tem nung tesayur tajungtibatem lir aser free education agütsür. Iba ajanga kaketshirtemi pei ki anasa azünger aser alima den tokteper" ta Kruse-isa ashi.

Neiphiu Rio-i aniba sorkari education infrastructure akangshitsü atema scheme balala tenzüka inyakba atema tenüngsang agütsür ta laisa shisem.

Küm asem tsüingda lar constituency nung middle school ana- Midland o Daklane na high school jenjang nung ajungketba den Zubza Higher Secondary School ajungketogo ta Minister Kruse-isa metetdaksü.

"School jenjang ajungketba ta tetenzük tasen ka lir aser iba ajanga Nagaland nung sorkar school tem tashi itdaktsüsü merangba sayur" ta Advisor Dr. Yhome-ia ashi.

Tesüiba küm ana tsüingda nija school tem nungi kaketshir 34 tashi Pesocha High School nung azünger aser iba ajanga tsürabur nem küm nung Rs 30-40 lakh shi ajangzüksür ta pai ashi.

"Asen nübertem kanga takar masü, ajisüaka sensaktibaia pei tanurtem nija school tem nung züngdaksür. Anungji public-i sorkar rejutem indang tangatetba ya melenshitsü nüngdaker" ta Advisor Yhome-isa metetdaksü.

"Department-i infrastructure, governance, teacher management, curriculum

standards, aser learning outcomes tajungba küma education system yanglushitsü meranger. Scholarships, music education aser international educators den tesentaktep yangluba ajanga shisaliok jenjang tajungba kümogo" ta pai ashi.

Paisa lokti lenirtem aser tsüraburtem dang pei chirnurtem sorkar school tem nung züngdaksüsü ayongzük.

"Nagaland state mangudang 1954 küm Lower Primary School ka ama lapok. Ruzhukhrie Government Higher Secondary School sülenbo Daklane govt school ya iba temeket nung school tejen rongnung tanabuba lir" ta GMS Daklane School Management Committee Chairman David Sachü-i ashi.

Asür Neikuolie Solo aser par kibongi school lapoktsü ali tenlaba atema kanga pelar ta pai ashi

Iba school ya 2002 nung Government Middle School aküm aser 2019-2020 nung Swachh Bharat Kosh (Samagra Shiksha) kübok additional infrastructure yanglua liasü. State Level Education Committee (SLEC)-i December 19, 2025 nü Government High School jenjang nung ajungkettsü mulunga agizük.

2026 küm Daklane govt. high school nung Class IX kaketshir 22 lir aser kaketshir ajak agi 204 den tesayur 24 lir.

IPR ketdangsür nem Disaster Management & Fire Safety training agütsü



Dimapur, Tsüklai/February 27 (TYO): Disaster Management and Fire Safety indang anogo ana training tenzüker ananü buba February 27, 2026 nü Hotel Saramati, Dimapur nung ayongzükb nung Information & Public Relations (IPR) Department nungi ketdangsür aser staff tem shilem agia liasü.

Iba sentong nung "Role of Media in Disaster Management" aser "Basic Fire Safety & Relevant Section of the Nagaland Fire & Emergency Service Act, 2021" onük nung technical presentations agüja liasü.

Onük ana ya Assistant Manager, Media & Public Relations, Nagaland State Disaster Management Authority (NSDMA), GoN, Keren Rose aser Fire Prevention & Audit Officer (FPAO), Fire & Emergency Services, GoN, Kenny Khing nati lemsar jembu. Shisalen sayur den F&ES nungi ketdangsürtem aser Dy. SP, Zhasalie Naprautsu aser IPR ketdangsürtem iba sentong nung aden.

Iba sentong nung shisalen sayurtemi IPR ketdangsür aser staff tem dang osang tejangja wazüka ayutsü aser lendong timtem mapang telangzüba agütsüba mapang yaritepba nung media teinyaktsü tejangja angatetdaksü aser lendong timtem mapang media teinyaktsü rasaa ashi.

Shilem agirtem dang lendong majurudang tajungtiba nung osangtsüsang agiteptsü asoshi media houses tem den tesendaktep tajung yanglutsü ajungshia liasü.

Ajungben lendong timtem mapang osang tiazü prokshiba, oset taila lemshiba aser supply chain nung timtem ajuruba tebilemtsü koktettsü asoshi mapang shidak nung osang tejangja agütsü tongtipang lir ta ashi. Osang tiazü prokshiba metongshitsütsü aser intellectual property kumzüka ayutsü atema media den lungjemer inyaktsü nungdaker, ta ashi.

Alimar lendong timtem balala ajurudang IPR ketdangsürtem teinyaktsü lemsatepba mapang, nüburtem nem osang agütsüba aser keraa

tekum dangtsü osang prokshiba, media coordination, lendong aliba osang agitepba aser nüburtem nem awareness agütsüba, osangtsüsang ketdangsüba, social media aser digital outreach, nüburtem shilem agidaksüba, documentation aser lendong atalokba sülen osang abenba, disaster management ketdangsür den amalitep akaba aser nüburtemi metokmeperi lemsatepba bentetratetba indang tali tejangjaba nung angatetdakja liasü.

Media platforms tejangja ajanga osangtsüsang shidak belenshiba ajanga nüburtem tetsübo nung aliba ajemdaksütsü, nüburtemi amalitep akatsü, disaster management tajungba nung ketdang sütettsü, ta shisalen sayurtemi ashi.

Kasa sentong nung Nagaland Fire & Emergency Service Act, 2021 kübok tongtipang tzüzüng-ozüng, mi lendong nungi jenbua alitsü yimyatem, safety protocols aser mi lendong nungi kumzüka alitsü asoshi hands-on demonstration sayua liasü.

DoSE-i school ketdangsürtem dang NBSE sülen anidaksü tuyur

Dimapur, Tsüklai/February 27 (TYO): Kaketshir indang School Bags tuozük shidak amshidaksütsü dak sendakba nung National Human Rights Commission nungi totuyuba agütsüba nung ajemdaker School Managements (Government & Private) ajunga dang Nagaland Board of School Education (NBSE) ajanga 19/07/2021 nung sangdong

agütsüba nung shia aliba ama inyaktsü nenshia metetdaksür, ta Directorate of School Education (DoSE) sangdong ka ajanga ashi.

Maneni State Council for Educational Research and Training (SCERT), Nagaland mesüra Nagaland Board of School Education (NBSE) ajanga amshitsü melaba text books tem kisüng school nung

amshitsüla.

Item totuyuba sülen manidakba lira tapet mera agütsü atema SDEOs/Sr. SDEOs/DEOs nem osang agütsütsüla. Tekalen shia aliba Officers temi item ken o mebentetra, kasa ken o ya Principal Director, Directorate of School Education, Nagaland, Kohima dangi abentsü akok, ta sangdong ajangasa ashi.



Chümoukedima district kübok Tir yim nung February 27, 2026 nü Nagaland PWD (R&B) kilonser Wb. G. Kaito Aye-i Community Multipurpose Hall semzüksür Tir yim lenirtem den agiba noksa ka yangi angur.

DIPR nung AA, PIO aser APIO shimer

Dimapur, Tsüklai/February 27 (TYO): Department of Information and Public Relations, Nagaland ajanga sangdong ka nung, Right to Information Act, 2005 indang Section 5(1) nung shia aliba ama aser nübur tenzüksü asoshi Nagaland Angh-i Department of Information & Public Relations nung Appellate Authority (AA), Public Information Officer (PIO) & Assistant Public Information Officer (APIO) ama inyaktsü nübu shimogo, ta ashi.

Orenthung Lotha, Commissioner & Secretary,

Department of Information & Public Relations, Nagaland and Department of Cooperation, Nagaland ya Appellate Authority (AA) ama inyaktsü, Küsa Fithu, Addl. Secretary, Department of Information & Public Relations, Nagaland ya Public Information Officer (PIO) ama inyaktsü aser Tiakumba Jamir, Deputy Secretary, Department of Information & Public Relations, Nagaland ya Assistant Public Information Officer (APIO) ama inyaktsü, ta sangdong ajanga metetdaksü.

Dimapur nung District Business Reform Action Plan senden amen

Dimapur, Tsüklai/February 27 (TYO): Deputy Commissioner, Dimapur, Dr. Tinojongshi Chang, NCS lenisüba kübok District Business Reform Action Plan (DBRAP) indang senden ka February 27, 2026 nü DC, Dimapur indang Conference Hall nung mena liasü.

District level nung 'ease of doing business' tajungba kumdaksütsü nükjidong nung yangluba District Business Reform Action Plan mapa kuma inyaka aotsü indang jembishinütsü atema iba senden ya mena liasü. Iba senden nung sendaktepa aliba department tem nungi tekolaktem dena liasü.

Yawelie Noudi, Deputy Director, Department of Industries and Commerce ajanga Reform Action Plan indang lemsatepa liasü. Pai Department for Promotion of Industry and Internal Trade (DPIIT) ajanga tenzükb Business Reform Action Plan (BRAP) indang nükjidong rateta ashi.

Iba senden nung 'District BRAP aser State BRAP, time-bound inspection systems, digitization and mutation of property, district-level investment facilitation, aser fostering startup growth in Tier 2 and Tier 3 cities' indang tejangja PowerPoint presentation agüja liasü.

Iba mapang DBRAP aser SBRAP kübok temelenshi balala den reporting templates, district aser state ketdangsür teinyaktsü mapatem indanga lemsatep.

Deputy Commissioner, Dimapur-i mapang shidak nung temelaba, licenses aser No Objection Certificates (NoCs) agütsütsü nungdakba indang ashi aser item temelenshi tiptema inyaktsü atema department tsungta amalitep akatsü ayongzüka liasü.

District nung 'business-friendly environment' adokdaksütsü, tali ochishia inyaktsü atema department ajunga dang shilem agitsü pai ajungshia liasü.

Dimapur District Task Force on Immunization senden amen

Dimapur, Tsüklai/February 27 (TYO): District tesem ajunga nung campaign tenzüksü lia February 27, 2026 nü Deputy Commissioner, Dimapur indang Conference Hall nung Dimapur District Task Force on Immunization (DTFI) senden ka mena alima aser linük nung cervical cancer aser Human Papillomavirus (HPV) vaccination indang tensa asadanga liasü.

Senden nung mendenpuba, Deputy Commissioner Dimapur, Dr. Tinojongshi Chang, NCS-i department aser partners tem dang temsüa aliba beneficiaries timba ayimjemtsü atema osang prokshiba nung shilem agitsü ayongzüka liasü.

Senden nung Regional Project Officer, United Nations Development Programme

(UNDP), R. Khartu Monsang-i alima nung HPV vaccine indang PowerPoint tejangja agütsü.

World Health Organization data ajanga ashiba agi, alima nung linük 194 aliba nungi linük 155 nung HPV vaccine ya parnok indang national immunization programmes nung inoka lir. South-East Asia Region nung linük 11 aliba nungi 9 nung iba vaccine amshi tenzükgogo, ta Monsang-i ashi.

Presentation mapang alima nung cervical cancer tebilemtsü indanga lemsatepa liasü. Globocan 2022 ajanga ashiba agi alima nung tetsürtem dang timtiba adokba cancer jenjang pezü buba nung cervical cancer ya lir, aser 2022 küm cases tasen 6,62,300 aser tasüba 3,48,874 liasü.

(Maneni tapak 8 nung...)



February 27, 2026 nü New Delhi nung Patriarch of Antioch & All The East aser Universal Syriac Orthodox Church nung tekolak, Moran Mor Ignatius Aphrem II den tangartemi Ato kilonser, Narendra Modi den senden amenba sülen tangokba noksa nung angur.

Court kati excise ken o nung Kejriwal densema nisung 23 maitsür

New Delhi, Tsüklai/February 27 (Agencies): Hokolbarnü Delhi nung aliba court kati Delhi excise policy ochimashi ken o nung tai tonglokja alir 23 prongla maitsüi obendang agütsüogo; parnok 23 rongnung taoba mapang Delhi Chief Minister aser AAP tongi, Arvind Kejriwal aser Aam Aadmi Party lenir, Manish Sisodia na densema lir.

Rouse Avenue Courts nung Special Judge Jitender Singh-i, ken o benokertemi tai tonglokja alirtem anema kuli magütsütet, ta metetdaksü.

Excise policy oshimashi ken o dak sendakba nung maitsürtem rongnung Kuldeep Singh, Narender Singh, Vijay Nair, Abhishek Boinpally, Arun Pillai, Mootha Gautam, Sameer Mahendru, Manish Sisodia, Amandeep Singh Dhall, Arjun Pandey, Butchibabu Gorantla, Rajesh Joshi, Damodar Prasad Sharma, Prince Kumar, Arvind Kumar Singh, Chanpreet Singh, K Kavitha, Arvind Kejriwal, Durgesh Pathak,

Amit Arora, Vinod Chauhan, Ashish Chand Mathur aser Sarath Reddy densema lir.

Delhi sorkari 2021 küm nung excise policy ya benoka liasü. Saru teimba akümtsü aser yi shishilembaba inyakym melenshitsu nükjidong nung iba mapatong benoka liasü, ajisüaka iba mapatong nung ochimashi lir, ta tai tongloktsüba sülen excise policy ya anena liasü.

Court-i iba ken o nung parnok ajak maitsüba sülen Delhi Lieutenant-Governor Vinay Kumar Saxena-i iba tatalokba ya CBI-i bushisüngdangtsü tuyu. CBI aser Enforcement Directorate napronglai, public senpong nungi nija kar tajanzük ngudaktsüsü nükjidong nung iba policy ya renem, aser iba maparen nung ochimashi jenti lir, ta tai tonglokja liasü.

Hokolbarnü (February 27) court-i iba ken o bushisüngdangba nung metokmeperi jenti aliba atema CBI aitsüogo; tai tonglokja aliba

balala atema kuli magütsütet, ta metetdaksü.

Court-isa, CBI-i Sisodia anema kuli magütsütet, excise policy benokba nung pai shilem agia aliba kuli kecha mali, mesüra aibelenba nung pa sendaktepa mali, ta metetdaksü.

Arvind Kejriwal dak sendakba nung court-i, kuli tejanga makai pa anema tai tongloktsü; kuli mesüra tenük kuli alirtem kecha makai pa anema asalentong yanglu, ta metetdaksü.

Kuldeep Singh dak sendakba nung judge-i, iba ken o nung tai tonglokja alir mezüngbubaji Singh lir, ajisüaka pa anema kuli kecha mali, ta metetdaksü.

Rouse Avenue court-isa CBI Investigating Officer anema departmental inquiry tuyuogo.

Iba ken o dak sendakba nung Manish Sisodia jail nung anogo 530 shi puoka liasü aser Kejriwal-a mapang balala nung anogo 156 jail nung liasü.

J&K nung CRPF sepai anati pei sasa khaseta asü

Srinagar, Tsüklai/February 27 (Agencies): Hokolbarnü Jammu & Kashmir kübok Srinagar aser Shopian district na nung CRPF sepai anati pei sasa khaseta asü, ta ketdangsertemi metetdaksü.

Srinagar yimti kübok Parimpore police station

telung nung aliba company ka nung mapa lezmükja aliba Central Reserve Police Force (CRPF) sepai, Hari Om-i pa meyong prangpong agi pa sasa khaseta asü.

Ano tanga tatalokba ka nung, Shopian district kübok Batapore nunga CRPF camp

ka nung CRPF sepai, Manish-i pa meyong prangpong agi pasasa khaseta asü.

Tang tashi nungbo sepai ana jagi kechiba pei sasa khaseta asüar mejangja, ta ketdangsertemi sasa metetdaksü.



Patna, February 27, 2026: 'Ramzan' temeshi ita nung Hokolbarnü Bihar yimtiba, Patna nung Muslim nungertem sarasadem dang tangokba noksa nung angur.

Tamil Nadu nung party temi kenüyongi election agitsü mepishir: CEC

New Delhi, February 27 (Agencies): Hokolbarnü Chief Election Commissioner (CEC), Gyanesh Kumar-i, tawa Tamil Nadu nung electoral rolls merüktetsü atema agiba SIR inyakym kanga takok ngua agiogo, aser iba ya linük atema model ka asütsü, ta ashi.

Paisa, Tamil Nadu nung yimtenren party temi taruba assembly election ya kenüyongi dang agiadoktsü mepishiogo, anungji lenla ajaklen nungi asadanga sülen commission-i telemtetba agitsü, ta metetdaksü.

Paisa, Tamil Nadu nung Assembly election ji yaküm Bihar election dang nungi tajungba agitettsü, ta metetdaksü.

Osangbenertem den

jembidang Chief Election Commissioner-i, "Bihar nung agiba election tu tesüiba küm aika tsüngda election tajungtiba agitetba liasü. Tang district collectors, SPs, election ketdangsertem aser enforcement agencies ajaki Tamil Nadu election ji Bihar dang nungi tajungba agitettsü ta kü dang shiogo," ta metetdaksü.

Kumar-i, Tamil Nadu nung polling station 75,000 amenoktsü aser ajak nungji VVPAT azüngtsü; vote azüngba tembangba sülen-a candidate temi anogo tenetnü tashi EVM aser VVPAT medemdangtsü akok, ta metetdaksü.

EVM votes mazüngdang postal ballots anaben azüngtsü, ta paisa metetdaksü.

Canada PM Mark Carney-i India semdang

New Delhi, February 27 (Agencies): Canada Ato kilonser Mark Carney leniba nung ketdangsertem Hokolbarnü Mumbai tonga aruogo; pai anogo pezünü India semdang.

Ato kilonser Narendra Modi-i jaokba nung ajemdaker Carney-i February 27 nungi March 2 tashi India semdang, ta Ministry of External Affairs (MEA)-i metetdaksü.

Tang Carney-i India semdangba ajanga linük ana tsüngda tesendaktep raksar aliba tanaben yanglushitsü imlar.

Linük ana tsüngda tesendaktep yanglushitsü aser asalentong tsütsü amalitepa inyaktsü nükjidong nung Canada Ato kilonseri India semdang.

India nung rongsenkettzüng yimtiba, Mumbai tama semdangba ajanga Carney-i rongsenkettzüng tsütsü taliba ranglokba jangjar. Pai anogo ananü tashi CEOs, rongsenkettzüng tsütsü mongintem aser Canadian pension funds nungi züngsemtem ajurua senden amentsü.

Iba sülen March 1-2 anogotem nung pai New Delhi nung tongti ketdangsertem ajurua senden amentsü. Delhi nung aliba Hyderabad House nung linük anaprongla nungi ketdangsertem tsüngda senden amendang telemtetba aika agitsü imlar.

March 2 nüsa pai Ato kilonser Narendra Modi den-a senden amentsü.

Ministry of External Affairs-i, India-Canada Strategic Partnership kübok lenla balala nung tesendaktep tajungba akümtsü atema jembitsü; item lenla rongnung energy, tongtibang minerals aser research densema lir, ta metetdaksü.

2023 küm Canada nung Khalistani lenir, Hardeep Singh Nijjar tepsetba sülen taoba mapang Ato kilonser Justin Trudeau-i Nijjar tepsetba ken o nung India nem tai tongloktsüba ajanga linük ana tsüngda tesendaktep raksaa liasü.

Ajisüaka tang Canada nung Carney yimsütsüba kübok linük ana tsüngda tesendaktep tera tajungba kümogo. Tang Canada nung tongti ketdangsertemibo, Canada nung nisung tepsetba nung India-i shilem agia mali ta bilemer, ta shiogo.

Form No. 3
[See Regulation-13 (1)(a)]
DEBTS RECOVERY TRIBUNAL
GUWAHATI
Suwarna Bhawan, House No. 12, New Town Path, Near Hulubari Mandir, G. S. Road, Ulubari, Guwahati- 781007 (Assam)

Case No.: OA/576/2025
Iba Act nung section 19 kübok sub-section (4) aser Debt Recovery Tribunal (Procedure) Rules, 1993 nung rule 5 kübok sub-rule (2A) nung ajemdaker jaoaker.

Exh. No.: 6028
PUNJAB NATIONAL BANK
-Vs-
M/S TOUCHSTONES & Ors

To,
(1) M/S TOUCHSTONE
A Proprietorship Firm, Represented by its Proprietor RUOKUONEILIE KESIEZIE, Situated at Tsietharu, Near Directorate of Fisheries, Kohima, PIN-797001, Nagaland.
(2) MR. RUOKUONEILIE KESIEZIE
Son of Late Keduosievi Kesiezie Address- Tsietharu, Near Directorate of Fisheries, Kohima, PIN-797001, Nagaland.
(3) MR. DZIESEVILIE KESIEZIE
Son of Late Kuolie Kesiezie Address- City Press, Below U.T. Building, Kohima, PIN-797001, Nagaland.
JACKER
17.02.2026 nü Presiding Officer/ Registrar matsüngdang OA/576/2025 benoka liasü.
Iba Act nung section 19(4) kübok shia aliba application nung ajemdaker Iba Tribunal-i sentshü Rs. 3328120.22/- (application den documents etc. densema lir) alanzütsü atema na jaoaker/notice agütsür.
Iba Act nung section 19 kübok sub-section (4) nung ajemdaker na, aser defendants dang tsünglanglen alibatem tuyur :-
(i) Iba case defend asürtemi tajaba agütsüba sülen anogo semer nü tsüngda relief asoshi mepishibaji kechiba magütsütsü, iba kuli sayutsü metetdaksür;
(ii) Original application nung serial number 3A kübok shia aliba kiojen aser assets dak alia tanga kiojen aser assets sangdongtsüla;
(iii) Original application nung serial number 3A kübok shia aliba kiojen aser assets ayoktsü mesüra item kiojen atema inyaksangshitsü memelar;
(iv) Security interest atema inyaksangshiba dak alaka Tribunal dang nungi jelia temelaba magii original application nung serial number 3A nung shia aliba kiojen mesüra tanga assets ayoktsü, lease asütsü mesüra tanga kecha inyaksangshi masütsüla;
(v) Ordinary business ajanga secured assets mesüra tanga assets aser kiojen nungi yokzüba senji security interest soita aliba bank mesüra financial institutions indang account nung deposit asütsüla.
Nü dang tezüluba nung sangdong applicant nem agütsütsü tuyur aser 30/03/2026 anogo nung anepdang 10:30 ako nung Registrar matsüngdangi arutsü tuyur, yamaji meinyakra application ji angadangtsü aser na meliaka telemtetba agitsü.
18.02.2026 anogo nung tsünglanglen kü meyongnem den iba Tribunal indang seal agütsür:
Registrar,
Debts Recovery Tribunal, Guwahati

- ALI AYOKER -

* Prime land for Urgent Sale ! * Naga united village
* 70,000 sq. ft. * Plain stable high land
With concrete boundary walls and natural drainage.
* Near the main road * Any plot size available
@ 430/- sq. ft (Negotiable & No broker)
Contact : 7628822085 / 9366156425



TIR YIMYIM YIMOBILEM (EDITORIAL)

DIMAPUR

KÜPTOKNÜ

TSÜKLAI 28, 2026

Yashi mapa agi tanü kangshir !

Tanü asüngka nungi anogo shia amato Nagaland government nung inyakertem rongnung parnok nüngdak mataloktsüba aser temulung masüba agi state government nem takangba agüja longkak aitba angashir aser angur. Aji oda, tawa khenbo Nagaland government nung inyakertem ajak longkak aita amungba anogoa liasü aser yashi tashi government school nung tesayurtem rongnunga küm ter dak tali inyakaka ano tang tashi mapa nung 'regular' mesütsüba anema karbo lumia dena longkak aitba asenoki nguogo aser ano tang government school nung tesayurtem meyrirjang ana dak tali nem tangar tesayurtem nem agütsüba kasa ita sen magütsüba ajanga longkak aitba angur. Itemji dang masü saka School Education department nungsa Govt high school-bo yimsüng ajak nung amato lapoka toktsü saka tazünger mali , anungji tesayurtembo yoktsüla ta asüba tebilemstütema lir. Ano medical doctor-tema kasa timtem ajuruba asenoki angashir. Item tebilemstü ajak ya tanü ajungbenaka poktetba tebilemstü masü saka tesüiba kümtem nung junga mebilemdangi inyaksaba mapatem lir. Atangji, küm ishika sülen timtem takoksa ajurutsüsa meshitak agiba telemtetbatemji aika mangatet aser merajemi agiba telemtetbatem masü saka nisung kar government mapai yoktsü mechi nung nüngdak mali ser nung inyaker shimtsü asoshi mapa adokdaksüba mapatema lir. Aji oda, Centre nungi khen atema yokba sentongtem ajanga shimba tesayurtem asüyonga mesüra inyakertem asüyonga, parnokji shimdangyongi parnok inyaka aotsüba kümsük aser ita sen dak aketba mapatem jangjangjaa lateta metetdaksü asübo, tang amai inyakertema aser government-a tebilemstü majurula. Ajisüaka, asenok nüngdak inyaksü purtem nema ita sen agütsütsü maka ser nung, asenoki nüngdak maka, mapa mali ser nung government mapa nung ita sen chia lidaktsütsü asoshi nisung tanen maka shimok aser Nagaland nung office-i mao ,mapa maka ser angati ita sen chia alitsü memeshi aser meindang sobaliba ka tenzük, iba jagi tanü Nagaland timtemdaksür aser rajang kümdaksür. Aji oda, government mapa nung anioxtsür yimsüsür aser tulurtem tobo par teinyaksü inyaker, tagitsüa agir ogo saka tanü lanu putu nung inyakertembo timatemer. Ibaji dang masü saka mapa meinyak ser ita sen chia taküm alitsü aser mapa meinyak ser tiyazü bill yanglua agitsü aser subsidy agitsü asoshi dang bilema tiyazü file bener jajatsü ta asüba sobaliba tamajung tenzüka yutsüba agi, tanü iba sobalibaji meindoktet kangshir. Aji oda, Nagaland nungbo sen dang lira mesüra vote dang enoktsüra government mapa angutsü ta asüba inyakyim aser sobaliba nung mapang talangka Nagaland mashimashi aruogo. Aji dang masü, saka government nung kinunger tulur lira, ibaji government mapa angutsü atema jelia 'appointment order' anguba amai ka liasü. Anungji, Nagaland nungbo government mapa angutsü atema kecha balaka tashitemetet aser mapa inyakyim memetetyonga degree lira ojang, kechiyong government mapai aibaji mapa inyaksü atema masü saka ita sen achitsü atema aier ta teshimeri tangatetba agütsü aser mapai aiertemia bilem. Iba tangatetba aser iba sobaliba tamajungji meintoktet tanüa asenok maparen aika nung kangshidagi. Atangji, alima yimya, kar mapang nung tarutsü asoshi bilema mapa shitak inyaka aotsü saka ano kar mapang nungbo pei ajung aser ajangzüksü asoshi dang bilema mashi mashi inyaksü. Anungji, tesüiba telemtetba aser mapatem agi tanü alirtem timtem aser takoksa ajurudang ya, meshitaki aliba inyakyim ajak metongshia shitak küma yanglushitsü merangtsüla. Atangji, tangari inyaksaba mapa ka shitak küma yanglutsübaji temela masü, yangji timtem, takoksa aser nüngsen ajurutsüsa mapa aika lir, saka kar makoksa-ang aser kari timtem magiang tim masüba mapatem shitak küma meyanglushitetsü. Iba tangatetba nung tanü alirtemibo tarutsü lanur asensortem asen mapa agi timmatemtsüsa inyaksütsüla. Ibajang shitakba senmang tajungji asütsü.

OLEMSABANG

RSS inyakyim aser Impur Mission wadang

P. Renthly Jamir

RSS Rashtriya Swayamsevak Sangh ta jembiba ya ajaki metetba o ka lir. Iba telok ya küm 1925 September 27th nü Dr. Keshav Baliram Hedgewar-iMaharashtra Nagpur nung India ya Hindu lima tashi tait lima ka yanglutsünükjidong nung tenzük. Pai ashiba agi India nunger ya Mughals nungeri küm800 alar süa (enslaved) ayu, ano British rule nung küm 200 ali. Anungji pa tayongzükba sarasademji "A Spirit of Sacrifice and dedication developed victory to Bharat Mata". "India terenlokba nung takok angutsü meshitetabendanga agütsüba tanela". Tamasabo anogo nung Ghonda ka ka dang agiapractices tenzük (Hindu Dharm) oda oda temulunger telok tentet tapu aikatenzük ano yoga ama tenzük Hindu lanurtem merangtepa inyakyonga aru. Ashiba agi parnokia küm noklang majungdang yamai takok tulu angutsü tabokhenyongi mebilem.

India lima ya tatem külen nungi külen tashi nübu ajakji Hindu nunger dang lir. Yimsü tapu balala amangerbo ishika dang lir. Tamajung nunga tajung nungakecha mesütet. RSS nisung kati Ghonda kaka agia tenzükba tanem tanemitakok ka khen ka khen ta inyakteta aru. Item rongnung tulutibatemi Ayodhya nung Muslim tekülem ki Babri Masjid 6-12-1992 nung kar Sevaks volunteers nübu 150000 adenshir anüka jareptsüba. Iba ya government-i kecha meshitetetzü India lima nungbo Hindu nunger mulung parnok dang governmentikecha meshitet. Tanabuba takokji Prime Minister Modibai 2014 December nung UNO nung tebilemba (proposal) ka agütsüba agizüka UNO-i 21-06-2015 nungi yoga Day amungba koba Hindu nunger yimsü nung tekülem tapuka lir (Hindu Meditation) joko par telok BJP India nung power arua A.B Vajpayee shiba RSS tenzük ka Prime Minister aküm parnok nok leptetaIndia nung tongtibangsa Muslim aser Khristantem reshikangshitsü tenzük. Joko Census nütsungzüng atemer CAA nungi SIR tashi nung tanem tanemiMuslim aser Khristantem linük yongzük nung tenung katitokja nübu tajembakümdaksür. Tang RSS Chief tokolak Mohan Bhagwat aser Prime Minister Modi government kübok Hindu temeja yimli ka yanglutsü Muslim aserKhristantem nütsüng kenshia Karbianglong tashi katitokja inyaktetogo. Iba inyakba tetezü joko Khristantema kata tali amangloka maotsü Hindu nunger dang Yisu amangang ta shira jaili aotsü.

Kuli aika bushia maoyonga 30-11-2025 nung NBCC, Baptist Pastor's fellowship kohima, Nagaland joint Christian Forum parnoki ayongba Revival nung adentsü Rev Franklin Graham arutsü aliba RSS tashi ajanga BJP governmenti visa cancelled asü. Tang India aser Nagaland government anaprongla BJP teloksa lir. Aji dang masü 2025 kumbo India lima tatem külennungi külen tashi Kerala, UP, Chhattisgarh, Rajasthan, Assam Nalbari tashiarua Khristantem Christmas melidaktsütsü nokdanga RSS teloki timtemagütsü. Anungji nungtugu osang sangtonger News Commentator Rajdeep Sardesa-i Christmas A Target of Hate who will punish Goon Culture ? Christmasji Tesempatsü alizüng ka asü ozüng raksarji (Goon lawless person) shibai merenshitsü? Ta alima dang ayimokja sangtong. Saka Prime Minister Modibai anir yimsüsür shingaia yamai nong ta ola kata matok tasür akoksa, teraksar akoksa , RSS dang kecha ashir mali. Iba ama tatalokba tulu nung ya Mizoram State BJP president aser Meghalaya State BJP President tenatiboyabo tim masü iba tashi meinyaksüla ta ashi. Saka Nagaland State BJP Presidentibo ola kata madok Nagaland nungi ola adoker mali asü. Tang joko India nung Army tema Hindu nunger dang agitsü ta defenceMinister Rajnath singh-i ashiba chief of the army-i sangdongba ajaki nguogo "In Indian army, all non Hindu caste must be reduced by over 50% from the year 2028, if they embrace Hinduism Their service will be extended for 5 years Indian army for Hindu not for outsiders. Hindu yimsü magizüker ajak 2028 nungi katitsü. Taoba küm Indian army Khristan kati Hindu tekülem ki telungi maitsü ta asüba agi pa army nung kati. Pai High Court dangi case abensaka temeden mangu, ano Supreme Court dangi aben yangjia kasa dang liasüküm trok tarak maket inyaka arur keti.

(Maneni asüng adok nung angutsü...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

YouVersion CEO Gruenewald-i Kenya nung Nairobi hub tenzüksüogo



February 23, 2026 nü Nairobi nung Laishiba App YouVersion-i Kenya hub tenzüksüba sentong nung tangokba noksa nung angur.

February 27, 2026: February 23, 2026 nü Nairobi nung Laishiba App YouVersion-i Kenya hub tenzükogo aser iba ya region den apet app contents agütsütsü nükjidong nung lir.

Osangbener den jembidang YouVersion CEO, Bobby Gruenewald-i, Africa nung digital ajanga Laishiba azüngertem jenti akümba ajanga tanela tamendakdak yanglua yutsüba ajanga tang kera süngjang atangba sayur, ta metetdaksü.

Paisa, region balala den apet iba app yanglutsü atema tesendaktep junga yanglutsü nüngdaker, ta metetdaksü.

"Ibayongji küm ishika tejaklen onoki alima tesem balala nung office amenoktsü aser nisung aika anioksemsü atema apiteta liasü, aser tanübo iba anogoji tongogo ta onoki bilemer," ta paisa metetdaksü.

Gruenewald-i, "Küm ka tejaklen nungi onoki regional hubs tenzükua liasü; mezüng Brazil aser Mexico City na nung hubs tenzük, iba sülen Australia nung tenzük. Tang onoki Africa nung rangloker Kenya aser South Africa nung hubs

tenzükogo aser tarutsü nung Europe-a ayimjemsü tebilemba lir," ta ametetdaksü.

Item hubs lapokba ajanga Arogotem aser region shia nung 'contents' agütsürtem den tesendaktep tajungba akümtsü, ta pai metetdaksü.

Kenya nung iba app kanga sapua amshiteper. Iba linük nung YouVersion app install asüba million 19 jungogo aser anogo shia iba app amshir million 3 shi lir.

Nairobi nung hub lapokba sentong nung jembidang Gruenewald-i, "Taonung langa tenzüksü atema onok yagi aruba masü. Tsüngremi iba linük nung tenzükua yutsüba maparen ka inyaktsü atema onok yagi aru. Iba continent nung Khristan yimsü küm 2,000 jungogo, aser tetenzük nungi Africa nungertemi shilem agia liasü," ta metetdaksü.

Kenya nung dang masü saka Nigeria nunga iba app install asüba million 40 jungogo aser anogo shia iba app ajanga Laishiba azünger shilem 42 agi teimba kümogo. Ethiopia nunga iba app install asüba million 5 jungogo aser anogo shia iba app

amshir shilem 94 renlokogo.

Tang alima nung anogo shia iba app ajanga Laishiba azüngertem teimba aliba linüktem rongnung South Africa, Kenya aser Nigeria densema lir. Africa nung dang masü saka alima tesem balala nung iba app ajanga Lai azünger aika kümogo.

Gruenewald-i, "Alima nung Khristan yimsü tiyongtsü tesemji Africa akümtsü, ta nisung kari asadangtetogo. Onoki anguba kuli apibo ibaji atalokogo," ta metetdaksü.

Kenya nung iba hub lapokba pelaa agizüka Kenya Tir kinüngtsü, Rachael Ruto-i, Kenya hub lapokba ajanga kibongtem, talisa lanurtem nem teimla bener arutsütsü, ta metetdaksü.

Laisa, "Tanübo Tsüngrem O ya internet ajanga light tesangwa kera aoba ama prokshir. Kibongtem ayimjemer. Asenok kong lidir liaka asenok ajak ayimjemer," ta ashi.

Laisa, Kenya hub ajanga linük nung aliba nüburtem dang masü saka continent tesem ajaklen taküm jenti melenshitsü, ta metetdaksü.

UP nung anti-conversion ozüng kübok Kerala nungi pastor ka apu

February 27, 2026: Uttar Pradesh nung anti conversion ozüng kübok Kerala nungi pastor ka apu; pai ozüng alema nisung kar Khristan yimsü dangi meyipdaksütsü merang, ta pa nem tai tongloksü.

Arrshi küm 47 pastor, Jose Thomas ya Kerala yimtiba Thiruvananthapuram nungi lir aser tang pa Bihar yimtiba, Patna nung telidak, ta police-i metetdaksü.

Uttar Pradesh kübok Ballia district nung pai tetsür aser tanurtem telok tilaka ayongdener sentong ka agiba mapang nung security sepaitemi pa nokdang.

Mapa agütsütsü aser senotsü teyari agütsütsü, ta nangzuka pai tangartem

Khristan yimsü dangi meyipdaksütsü atema inyaker, ta pa nem tai tongloksü.

Police-i iba tesem nungji yimsü dak sendakba kakettem, kongki tapu balala aser sound system apu. Pa anema bushisüngdang tenzükogo.

Tawa Kanpur anasa Ghatampur nunga police-i Pastor Albin pua liasü. Pa-a Thiruvananthapuram nungisa lir. Bajrang Dal züngsemtemi tashishiba ken o agütsüba nung ajemdaker police-i pa apu. Par kinüngertema apu saka parnokbo mapang tatsüka tsüngda chiok aser pa-a hopta ka shi lir bail nung chiok.

Ano tanga tatalokba ka nung, Maharashtra kübok Nagpur district nunga police-i

CSI Church Nagpur Mission nungi Rev. Sudheer apu. Sentong ka nung pa den par kinüngertem aser medemertema apu, saka court kati parnok ajak bail nung chiok.

Alliance Defending Freedom India nung inyaker Dinanath Jaiswar-i, Uttar Pradesh nung anti conversion ozüng kübok pastor tem densema Khristan aika tepuokdak balala nung lir, ta metetdaksü.

Paisa, sarasadem sentong aser Arogo dak sendakba sentongtem nung timtem agütsüba aser Khristantem anema tashishiba agütsüba kanga bulua akümer, ta metetdaksü.

ANOGO ABEN TSÜNGREM DEN

Tazükoba Tetezü

"Nenok aremzükbaji tazükoba asoshi lir. Tsüngremi techirtem den ama nenok dang benschir kechiyong tebui memerenshiba ibala techir kar lir ma?" (Ibri 127)

Tazükoba aser temerenshi tsüngda tepila tulu lir. Temerenshiji yakta mapa kümdaktsünüba. Tanuri lenmang kar nung na yirutsüba atema meyipa taa agütsübaji temerenshi lir, "Nai kü anogo raksatsüogo". Iba tebilembaji mang ayangtsüba. Asenok dang mang mayangtsü ashir (Rom 12: 19). Kodaka merenshitsü Kibubai dang metet.

Tazükobaji tarutsü asoshi lir. Ibri kaket nung ibaji asenoki azünger: "Temerenshi ajak atongba mapang nung tepelatsü masü, saka tejashitsü mesüker; aji saka tesülen, shiri aji agi azüoka arur parnok asoshi temeshiba tesünep tejang tangtsür" (Ibri 12:11). Tanuri langka tai inyakba agi asenoki parnok merenshir masü, Parnoki tanaben aji meinyaktsü asoshi asenoki Parnok azüoker. Tazükobai tarutsü tia shimtsü sayur. Tazükobaji asenoki meimba kuli lir, temelaba agütsüba masü. Tsüngremi asenok azükoba yimya nung asenoki tanurtem azükotsüla. Tsüngrem temeshiba lemsateptsü asoshi pai asenok azüoker.

Laishiba nung Chubatem mapang amshiba 'Seal' ka ngutetogo



February 27, 2026: Israel nung highway tasen yangluba bushisüngdangba mapang nung Laishiba nung Chubatem mapang amshiba 'seal' ka ngutetogo; iba seal ji küm 2,800 tejaklen amshiba lir.

Tan ita Israel Antiquities Authority (IAA)-i iba seal ji sayatsüogo. Iba seal ji Aso 8buba tatembanglen amshiba asütsüa akok; seal ji senti oset agi chitetba lir aser temalenji 'pomegranate' süngjang pezü noksa lir aser tsünglanglen akhidang Ibri nung oshi nung "Makhach meyong, Amihai'er jabaso" ta ajenloka lir.

Iba tenüngji Tejen Lai nungbo shia mali, ajisüaka seal kiburji Laishiba nung aliba Chubatem-Jotham, Ahaz mesüra Hezekiah nung mapang nung liasü ta jangjar.

Israel nung Ein Tut Interchange yangluba mapang

nung iba seal ji tutet.

Israel Antiquities Authority-i, "Iba seal ji kiburi tekong nung azük amai azüker alitsüa akok. Iba seal ya akhi nüngshi oset bendenertem ket nungi masü saka ali nungi tutetba lir," ta metetdaksü.

Archaeologist David Amit-i, "Iba tesem nung tutetba osetji seal ji dang masü. Tamarener maitüsü keta aliba mori-chipo tejaksa-a ngutetogo, "Chuba meyong" ta zülua aliba den Hebron nüngja aser akhidang aliba Ziph yimti ajenloka aliba osettema tutetogo," ta metetdaksü.

Archaeologist Amir Gorzalczy-i, "Judah region nung item ama seal angubaji tang tasen masü. Ajisüaka northern Israel nung akhidang Laishiba mapang Chubatem aliba tesem nung seal tutetba yabo tesüngmangtsüka lir," ta metetdaksü.

**AO OSHI ANGAZÜKDAK:
TANÜ ANGAZÜKTSÜBA OJANG**



Tzütu

(n) ali atuba nung tzü atsinga aliba (dug well)
* Lenden lima nung tzütu nungi tzü taa agir.

Tziwa

(v) tzü manung tetsüing teben atepdena aoba (swim)
* Tziwa mashirtembo ayong nung masayatsüla.

OLONG PAITEP # 7428

								1	
2		3			4				
5				6			7		8
9			10						
		11						12	
							13		
14	15				16				
			17						

TIPILEN

- 2. Tetendangba - (8)
- 6. Ashiba metet - (7)
- 9. Asen / Saklok - (4)
- 11. Acha-ayanger - (7)
- 13. Tilutep - (4)
- 14. Yimli sayuang ta asüngdang - (7)
- 17. Tetezü aketba pungmang - (8)

LANGTSÜNGLEN

- 1. As _ _ _ _ nshi - (4)
- 3. Putep - (5)
- 4. Tashi balaka - (3)
- 5. Iba küm - (5)
- 7. Alima nung malir dang ajaba - (4)
- 8. Komo temaitsü - (5)
- 10. Tapok - (4)
- 12. Tamajung aküm - (5)
- 15. S _ _ _ _üwangshi - (4)
- 16. Jenjang aketba merang - (3)

OLONG PAITEP # 7427 TELANGZÜBA


TIPILEN :

- 1. Aben, 4. Artsü, 7. Lisem, 8. Liwa,
- 9. Sarasadem, 12. Aket,
- 14. Mangu, 15. Anünü, 16. Ango.

LANGTSÜNGLEN :

- 1. Aruli, 3. Balala, 5. Suwar,
- 6. Belem, 9. Süjak, 10. Aonung,
- 11. Dokan, 13. Tinu.

NAI-A YA METETTER MA



February 21, 2026 nü Las Vegas Motor Speedway nung "Largest Daytime Fireworks Display" otsü tasen ka yangluogo. International Fireworks Championship nung Ricasa aser Pyrotecnico yaritepa drone light show design sayudang alima otsü tasen yangluteta liasü. Pyrotecnico indang drone light show nung 1,020 pyrotechnic drones aser 2,024 integrated pyrotechnic smoke effects (two per drone) amshia liasü.

Churachandpur nung nübortemi asür MLA Valte nem tetushi agütsü



Imphal, February 27, 2026

(Agencies): Churachandpur nung nisung meyirjang aika adenshir 56-Thanlon Assembly Constituency MLA Vungzagin Valte mangyimogo.

February 25 aonung Churachandpur Medical College campus nung candlelight vigil ka ayongzük aser idangji kaketshirtem, civil society organizations, village representatives aser public

adenshia shilem agi.

Iba sentong ya Kuki Students' Organisation, Hmar Students' Association aser Zomi Students Federation dena kaketshir teloktemi ayongzük.

Tesentepertemi asür MLA Valte nem tetushi agütsü aser Manipur nung hill areas atema "Union Territory with a legislature" takhangba nenshiogo.

Bodbar anüngdang Valte

indang mang post-mortem examination atema district hospital morgue-i bener ao.

Pa asüba ya lisopurtem atema kanga dang tongtipang mapang ka aser hill districts asoshi political arrangements takhangba maneni özüngi melaba ama inyaktsü ta o jembirtemi ashi.

Valte'er jabaso tambusangi o jembidang pa tebui kin asoshi mapa inyakba aser tenangzükba tulu agiba bilemtetsü ayongzük.

Manik Saha-i Tripura kaketshir atema Haryana CM den jemb

Agartala, February 26, 2026

(Agencies): Gurugram nung Tripura nung biotechnology student ka dak teka sangshiba atema Chief Minister Manik Saha-i Haryana Chief Minister Nayab Singh Saini jembio.

Pai Haryana CM Saini den iba onük indangindanga lemsatep aser idangji Saini-i kaketshir nem temeten agütsütsü asoshi nüngdakba meratem agitsü

nanzüük ta CM Dr. Saha-i ashi.

Dr. Saha-isa kaketshir tetsü den jemb aser Tripura sorkari teyari agütsütsü nangzükogo.

Paisa Tripura Bhawan, Delhi nung Chief Resident Commissioner dang kaketshir kibong den maneni tongteptsü aser nüngdakba teyari ajak agütsütsü tetuyuba agütsüogo.

CM Dr. Saha-i ashiba sülen Social Welfare Minister Tinku

Roy-ia mozü ki semdangogo aser kaketshir osang metetpelaogo.

Chief Minister-isa kaketshir asoshi medical treatment tajungtiba agütsütsü atema Union Health Minister office den tongtepratepogo.

Tripura nung kaketshir ya Gurugram nung paying guest ka nung lar live-in partner den külemi lia arudang reshikangshi timtem ajurua liasü.

Mizoram sorkar mapa nung proxy ayur mapa nungi anentsü

Aizawl, February 26, 2026

(Agencies): Mizoram sorkari department balala nung "proxy" ayur sorkar mapa inyaker 29 tashi mapa nungi anentsüogo.

Sorkar mapa inyaker 37-i service norms alema parnok melena substitute workers ayuba putet aser iba jagi parnok dak disciplinary action agiogo ta Administrative Reforms Minister K Sapdanga-i metetdaksü.

Parnok rongnung nisung 29 mapa nungi anentsüogo aser 8 dak temerenshi kar agiogo. Item mapa ya bangdak ketdangsürtem indang Annual Confidential Reports (ACR) nung züluokogo ta Minister Sapdanga-i ashi.

December 2023 nung Chief Minister Lalduhoma ajanga sorkar tetuyuba ka agüja liasü. Iba tetuyuba nung sorkar mapa inyakertemi proxy ayuba anentsü aser January 2024 tashi nung pei pei department tem nem osang agütsütsü shia liasü.

Iba mapang sorkar mapa inyaker 3,600 shi kati 'substitute staff' ayuba nangzükba liasü. School Education Department nung nisung 1,115, Health Department nung 624 aser Power and Electricity Department nung 253 dena liasü.

Sorkari mapa inyaker 2,000-i parnok temang nung mokokmein aliba ajanga proxy

ayur ta ashi, 703-i kibong nung timtem aliba aser tanüngbatemi yimtsüngtem nung residential quarters maliba aser meta talang senzütsüsa akümiba agi substitute ayuba kulitem agütsü.

Special Voluntary Retirement Scheme, 2024 kübok Central Civil Services (Pension) Rules, 1972 ajanga ketdangsüba sorkar mapa inyakertem aser Mizoram New Defined Contributory System kübok küm 20 tema inyakertemi 'voluntary retirement' agitsü lenmang lapokja lir.

Mizoram nung sorkar mapa inyaker 45,000 aser 50,000 tsüngda asütsü ta ketdangsürtemi metetdaksüogo.



Manipur nung security forces-i tatalokba balala nung telungpur 9 tashi puogo. Parnoki Revolutionary People's Front (RPF) nung People's Liberation Army (PLA) züngsem pungu, People's Revolutionary Party of Kangleipak (PREPAK) züngsem asem aser Kangleipak Communist Party (KCP) züngsem ka apu. Parnok ket nungi prangpong-injang aika ngutetogo ta Manipur Police-i metetdaksü.

Pakistan-i Afghan yimitem nung bomb pokloktsü

Islamabad, Tsüklai/February 27 (Agencies): Pakistan-i Afghanistan kübok tongtipang yimitem nung Taliban government forces alidak yasüing bomb pokloktsü, koba taoba mapang tembar tajung ksüa aliba linük nung telungpur adokdaksür ta tai tonglokja indang-indanga amakba mezüngbuba alitsü aser iba tensa ya "open war" ka ama jembir.

Pakistan-i Afghan yimitem Kabul aser Kandahar yimitem alir. Islamabad-i telungpur masü saka Taliban military facilities nungbo tang mezüngbuba alitsü, koba ajanga Islamic kidanger linük ana tsüingta tensa mejungi kumogo.

A f g h a n i s t a n - i Brehostibarnü amakba langzüa Kabul, Kandahar aser Paktia province nung Taliban military offices aser posts nung air-to-ground missile amshia amak, ta Pakistan nung osang balala ajanga ashir.

Taliban yagi Pakistan amaktsü atema telungpur meyarir ta ashir aser par kidanger anema iba mesük tai tongloktsür, aser parnokkia Pakistani military installations nung tayang kepzüka amak saka tangatettep kati arutsü

renema lir, ta shia liasü. Arütsülena tesem balala nung raraba osang lir aser linük anaprongi takoksa jenti agütsüba shiogo.

"Onok aremzüka marok moshio. Tang ibai onok aser nenok (Afghanistan) tsüingta open war lir," ta Pakistan Defence Minister Khawaja Muhammad Asif-i Hokulbarnü ashi.

Linük ana tsüingta arütsü ya kilometer 2,600 talang lir aser yangji rara tenzüksü tensa ka nung lir.

Pakistan ket nung nuclear nok-nü lir aser mitkar tashi ya kanga agi Afghanistan dang tuluba lir. Ajisüaka Taliban ya guerrilla warfare yimba sübaa lir, koba US-i aniba sepaitem den küm aika rara arudang tajungba kumogo.

Pakistan-Afghanistan rara anendaktsütsü asoshi Russia, China, Turkey aser Saudi Arabia linük temi merangtar, ta osang ajanga ashir. Afghan Foreign Minister Amir Khan Muttaqi-i Turkey Foreign Minister Hakan Fidan dang linük anaprongi nungi bendanga agütsünung dang tangatettep kati arutsü ta ashi.

Iran ya Afghanistan aser Pakistan den arütsüa lir, aser parnokkia yariteptsü mulunga

aliba lemsatepogo, saka parnok ya US den nuclear ken o jembishinüba mapang lir.

Pakistan-i tayimtsü amshia Afghan military targets 22 amakba mapang Taliban ketdangsür aser telungpur 274 tepset, ta mitkar indang odongtar Ahmed Sharif Chaudhry-i osangbener dang ashi. Pakistan sepaia 12 asü, ta pai ashi.

Taliban odongtar Zabihullah Mujahid-i Pakistan sepaia 55 tepset aser posts 19 rakzüka ta ashi.

Pakistan sepaitemi Kabul, Kandahar aser Paktia nung Brehostibar aonung amakba aser Hokulbarnü Paktia, Paktika, Khost aser Laghman nung amakba indang jangjatsüogo.

Aonung amakba mapang nisung asü-amaba meliasü saka Hokulbarnü amakba nung civilian asüba lir, ta pai osangbener dang ashi. Tayang kepzüka ghonda ana operations agiba mapang Taliban sepaia 13 asü aser 12 yiru, ta pai ashi.

"Islamic Emirate of Afghanistan-i teti jembishinü ken o balala bentettsü meranga aru aser tanga onoki jembishinü ajanga iba ken o bentetner," ta Mujahid-i ashi.

OFFICE OF THE
CHANTONGYA KAKETSHIR TELUNGJEM

TENÜNGSANG AGÜTSÜR

Changtongya Kaketshir Telungjem ajanga Wb.Imlilepzuk aser Wt.Tinutula na jabaso **Sb.Tiaakum Jamir-i** Regional Rural Bank tatidang nung Probationary Officer (PO) jenjang nung takok anguba asoshi tenüngsang agütsür.

Tsüngrem-i ne taküm aser ne wadang manen-i moaja yariangma.



Kaketshir wadangi nung,

Sd/- **Sb. Akumdong Lkr** Tir, CKT

Sd/- **Kr. Tiazungla Jamir** Tongti tezukur, CKT

Office of the
Mopungchuket Senso Mungdang
Mopungchuket ; Impur: 798615

TENÜNGSANG AGÜTSÜR

Er. K. Imnajungba Jamir, Engineer-in-Chief, Nagaland Public Works Department (NPWD), Government of Nagaland jenjang tongtetba atema Mopungchuket Senso Mungdang ajanga tenüngsang agütsür.

Temsüa aliba ama mapa nung jenjang temabai ajungketba ya pa dak jeret-peret aliba, bendanga agütsüba aser meranga inyaka aruba ajanga lir. Pai iba takok ngutetba atema Mopungchuket nüburtem tejak tenteter, koba ajanga yimtsüing dangi konang aser tetushi bener arutsü.

Pai maneni bendanga agütsür terenlok asoshi nükla tuluba yur State nung aliba nüburtem tenzüksü Mopungchuket Senso Mungdang teimla lir. Nübur ajungtsü asoshi mapa tuluba agizüka inyakdang Tsüngrem temoatsü, shisatsü aser anema aliba taküm moajang ta Mungdang-i sarasademtsür.

Sd/- **Imlitongzük Jamir** President Mopungchuket Senso Mungdang

Sd/- **Nukshitemjen Lemtur** General Secretary Mopungchuket Senso Mungdang

US-Iran jembishinü temogo, tezüngzüktep mali saka teimla lir



Geneva, Tsüklai/February 27 (Agencies): Brehostibarnü Tehran indang nuclear sentong atema United States aser Iran jembishinüba nung terenlok liasü, ta tetsüingtai ia ketdang asüba linük Oman-i ashi saka ghonda aika jembishinüba nung tangatettep kati maruteti tembang.

Linük ana ya pei linük nung ketdangsür den shisa lemsatepba sülen yakta ano maneni jembishinü akatsü sentong lir, aser technical-level jembishinü taruba hopta Vienna nung alitsü, ta Oman Foreign Minister Sayyid Badr Albusaidi-i Switzerland nung senden mener tasüingji X nung post sütsü.

Hokulbarnü Badr Albusaidi-i Washington nung US Vice

President JD Vance aser US ketdangsürtem den jembishinü akatsü ta MS NOW ajanga Brehostibar aonung ashi. White House mesüra Washington nung Oman indang embassy nungi telangzüba kecha agüja mali.

Mapang talangka nungi tsükchir ama aruba Washington aser Tehran tsüingta tezüngzüktep agi asübo, US Tir Donald Trump-i Iran amaktsü amokmerena aliba tebilemstü terabo ajemtsü liasü.

Ajisüaka Brehostibarnü dangar teyari ajanga jembishinüba nung tezüngzüktep meyanglu, anungji region ya terata nung lir.

Geneva nung Iranian Foreign Minister Abbas Araqchi aser U.S. envoys Steve Witkoff aser Jared Kushner tsüingta indang-indanga ajurutepe masü saka Oman ketdangsür tetsüingtai ia jembishinü akaba ya anepdang khen aser nikongdang khen mena liasü.

"United States aser Iran tsüingta jembishinü nung terenlok tulu lia anogo tembangogo," ta Badr Albusaidi-i ashi.

Ajisüaka aikati tang tesüsa tangatettep kati arutsü

merangba ya Trump rarai aotsü telemtetba magidang maangka tatembangba ama ajiteter, aser Badr Albusaidi-i osang tejangja magütsü.

Iba jembishinü ya Iran-i temulung agüja US den jembishinü akaba rongnung ka lir, ta Araqchi-i Iranian state television nung ashi.

"Onük kar nung tangatettep kati aruba lir aser onük kar nung tangatettep kati marutetba lir."

"Ano yakta, hopta ka majungdang jembishinü akatsü telemtetba agiogo. Iran-i US sanctions agientsü atema akhangba jangja-jangja lemsatepogo, ta Araqchi-i ashi, koba Tehran nungi atsüanem akaba sülen ang Washington-i inyaktsü ta mapang talangka nungi jembia arur.

US nungi iba jembishinü nung shilem agirtemi sangdong kecha agüja mali. Ajisüaka US ketdangsür kati Geneva nung jembishinü akaba tajung liasü ta ashi.

Mapang talangka Iran indang nuclear maparen dak sendakba nung mangatettep adoker aruba jembishinü akaba mapang Middle East nung rara tenzüksü tetsübo lir. Trump-i tezüngzüktep melira amaktsü aiben amokmerena arur aser

US mitkar aser raradang amshiba hadir aser osettsüset aika Islamic Republic anasa tzüyim nung adenshia lir.

Iran ketdangsür kati, Washington-i nuclear aser nuclear masüba ken o bendangra US aser Iran nati tezüngzüktep ka asoshi framework yanglutettsü, ta Brehostibarnep shia liasü.

Trump administration-i iba jembishinü nung Iran indang ballistic missile program aser parnoki region nung telungpur telok yariba ya adentsüla ta shia arur.

Anepdang senden amenba sülen, telok anati shisatsü tajung lemsatepa liasü, ta Badr Albusaidi-i ashi.

Ajisüaka kasa mapang Iran ketdangsür kati tawa kar arureptsü lir ta shia liasü.

Tehran-i nuclear bomb yanglutsü meranger südi ta Washington-i amanger aser Iran indang uranium enrichment maparen ajunga anendaktsüner, koba atomic power plants asoshia totzü yangluteter aser kasa mapang nuclear bomb atema nüngdakba oset yangluteter.

Iran-i mapang talangka nungi bomb aginüa mali ta shia arur aser Brehostibarnü parnok jembishinü nung atsüanem

akatsü shia liasü.

Iran-i par ballistic missile program indang jembitsü memulungba ya tebilemstü tulu lir, ta U.S. Secretary of State Marco Rubio-i Bodhbarnü shia liasü.


Missiles ya America kistüing amaktsü yanglu aser region tashi ita alitsü atema timtem lir, ta pai ashi saka US litsü amaktsü jembiba nung kuli tejangja magütsü.

Trump-i February 19 nü Iran-i anogo 10 nungi 15 tsüingta tezüngzüktep ka meyanglura langka tamajung ataloktsü ta tekumandangtsü shia liasü.

Mongulbarnü pai State of the Union o jembidanga tangatettep kati aruner saka Tehran kodanga nuclear nok-nü mamshidaktsütsü ta shia liasü.

June ita US-i Israel den külemi Iranian nuclear sites tem amak aser ano January ita nungi Tehran nungshia arur aser linük tesem ajunga nung longkak aيتدang nisung meyirijang aika tepsetba asoshi teka sangshitsü Trump-i amokmerena liasü.

Iba sülen Trump-i region nung fighter jets aser aircraft carrier strike groups tem yoka lir.



UNIFY GOVERNMENT OF NAGALAND NATIONAL HEALTH MISIION NAGALAND U-WIN Digital Vaccination Platform Click to Protect Lives Ministry of Health & Family Welfare Government of India

HPV VACCINE: A SHOT FOR PROTECTION A STEP FOR CARE

#UWIN

Register on the U-WIN digital platform to schedule your daughter's HPV vaccination. Visit <https://uwin.mohfw.gov.in/home>

For more details, please contact your nearest health worker/ ANM at the nearest government health facility.

Scan and Join

HPV vaccine is provided for free to all 14 year old girls at government health facilities.

Champions League last 16: Real Madrid aser Man City maneni ajuruteper

Nyon, Tsüklai/February 27 (Agencies): Hokulbarnü last 16, quarter-finals aser semi-finals atema draw asüba nung Manchester City aser Real Madrid maneni ajuruteper, koba 2019-20 sülen Champions League knockout phase nung telok ana ya trokben buba ajuruteper alitsü.

Telok ana ya iba campaign nung khen ajuruteper lir aser ibaji December ita league-phase match liasü, kong City-i European champions 15 ben bena aliba Real Madrid ya 2-1 agi koka liasü.

Champions League puti otsü nung tang mezüngbuba telok ana seasons pongu atongtepa knockout stages nung asayatsü.

"Ozü club asoshi, iba competition otsü ajunga nung tajungtiba team tem den asaya tashi, nai angazüksü aser tajungba akumer aser tarutsü nung na tajungba asütsü," ta City boss Pep Guardiola-i osangbener dang ashi.

Taoba küm Champions League takok marok bena aliba telok, Paris St Germain ya Chelsea den asayatsü, koba taoba küm Club World Cup final asayaba kasa alitsü, kong Premier League nung asayari takok ngua liasü.

"Kanga jangratemtsü. PSG ya

team tajung ka lir. France nung parnok den asayaba ni ajangshia lir. Parnok team ya ni teti sakloka aru," ta Chelsea boss Liam Rosenior-i ashi.

Arsenal ya Bayer Leverkusen den asayatsü aser Premier League temaba jenjang nung aliba telok yagi league phase nung asaya ti nung takok anguba ajanga standings nung temaba jenjang nung aliba yong iba asayamung nung tesashi team majurur.

Arsenal ya quarter-finals tongtetyonga, parnoki Sporting mesüra Bodo/Glimt den asayatsü aser Real Madrid, Manchester City, PSG, Liverpool, Bayern Munich aser Chelsea ya draw telok ka nung lir, shirnoki iba asayamung tesüba editions ter nung melentepa takok ngua aru.

League phase nung Bayern Munich ya tanabuba jenjang nung liasü, aser parnok ya Atalanta den asayatsü, shirnoki playoffs nung Germany nungi Borussia Dortmund tsükdakja liasü aser quarter-final nung Real mesüra City den asayatsü.

Newcastle United ya Barcelona den asayatsü aser Liverpool ya Galatasaray den asayatsü. Premier League nung tang kanga timtema asayaba Tottenham Hotspur ya Atletico Madrid den asayatsü aser Bodo/Glimt, shirnoki iba season nung

City, Atletico aser Inter Milan madak takok ngua liasü, parnok ya Portugal nungi Sporting den asayatsü.

LAST-16 DRAW

Real Madrid v Manchester City
Bodo/Glimt v Sporting
Paris St Germain v Chelsea
Newcastle United v Barcelona
Galatasaray v Liverpool
Atletico Madrid v Tottenham
Hotspur
Atalanta v Bayern Munich
Bayer Leverkusen v Arsenal

QUARTER-FINALS

QF1: PSG/Chelsea v Galatasaray/
Liverpool
QF2: Real Madrid/Man City v
Atalanta/Bayern
QF3: Newcastle/Barcelona v
Atletico/Tottenham
QF4: Bodo/Sporting v
Leverkusen/Arsenal

SEMI-FINALS

Semi-final 1: QF1 winners v QF2
winners
Semi-final 2: QF3 winners v QF4
winners

FIRST AND SECOND LEG ANOGOTEM

Last 16: March 10-11 aser March
17-18
Quarter-finals: April 7-8 aser
April 14-15
Semi-finals: April 28-29 aser May
5-6
Final: May 30 nü Puskas Arena,
Budapest nung asayatsü.

1st Nagaland Police Inter-School Sports Festival tenzükogo

Dimapur, Tsüklai/February 27 (TYO): Hokulbarnü Chümoukedima Football Stadium nung mezüng buba Nagaland Police Inter-School Sports Festival 2026 tenzükogo, kong tetushi tesemdanger ka ama Commandant, 1st NAP Battalion, Aaron Patton dena liasü.

Patton-i iba sentong nung jembidang, Nagaland Police indang mezüngbuba inter-school sports festival ya tetoktepba ka tenzükba kisüng masü saka lanur kaketshirtem yimya tajung, teamwork aser tajungtiba nung asayatsü yimya tenzükba ka alitsü, ta ashi. Iba benjongmung nung Nagaland Police schools 15 nungi shilem agitar. Parnokji 2nd NAP Alichen, 3rd NAP Battalion High School, 4th NAP Regimental School, 5th NAP Holy Care, 6th NAP Tizit, 7th NAP Unit School, 8th NAP Unit School, 9th NAP MVS, 10th NAP (IR) PPS, DEF Mokokchung Police Unit School, DEF Mon Police Unit School, New Reserve Phesama Kohima, DEF Wokha, NPCS 1st NAP, aser Drivers and Helpers School alitsü.

BENDANGLI OSANG : Tapak 7 nungi...

Dimapur District Task Force on...

Global age-standardized incidence ya küm ka nung tetsür 1,00,000 nungi 14.1 lir aser tasüba ya küm nung tetsür 1,00,000 nungi 7.1 lir. Iba tashidak nungi jenbua aliba mesüra aziükba mera tajung melira, 2030 tashinung cases tasen kanga sashia akumtsü ta takzüteta aliba lemsatempa liasü.

Cervical cancer yagi uterus (cervix) tatemlen kongshir aser iba cases shilem 99.7 jungnüa high risk types HPV infection mapang shia aliba nungi adokdaksür. HPV infection ka kanga bulua lir aser aiben memeteter, saka ajanga cervical cancer adokdaksür.

2030 tashinung cervical cancer samadaksütsü World Health Organization sentong indanga iba senden nung jembia liasü, kong arishi küm 15 atongdang tetsür shilem 90 nem HPV vaccine ajunga agütsür alitsü, tetsür shilem 70 tashi high-performance test nung screen asütsü, cervical disease keta aliba tetsür shime 90 temang anepalutsü shia lir.

Indian scenario (NCRP-ICMR, 2022) nung, India nung tetsürtem dak cancer tashitak timtiba jenjang tanabuba nung cervical cancer ya lir. Age-standardized incidence rate ya 11.6 per 1,00,000 women per year aser mortality rate ya 5.1 per 1,00,000 women per year lir.

2022 küm India nung cases tasen 79,103 aser cervical cancer agi asüba nisung 34,805 liasü.

Dr. Rongsennungla, District Programme Officer (UIP & RCH), CMO Office Dimapur ajanga district nung HPV vaccination campaign indang tongmelang agi lemsatempa liasü. Iba campaign ya tetsür arishi küm 14 (küm 14 junger saka ano 15 majung) tain dak rangloktsü aser teshimtet Cold Chain Points (CCPs) nung ita asem alitsü, ta lai metetdaksü.

Vaccine ya Gardasil (quadrivalent), serotypes 6, 11, 16, 18 ayimjemtsü. Dose ya 0.5 mL asütsü aser teka abelen intramuscularly agütsütsü aser cold chain management kübok +2°C nungi +8°C tsüngta rizünga ayutsü nungdaker, ta ashi. Vaccination ya Cold Chain Points aser U-WIN portal registration atema internet connectivity aliba health facilities nung agütsütsü. Yangji vaccinators (ANM/LHV/Nurse), mobilizers (A S H A / A W W / L i n k Workers), verifiers aser health staff tem alitsü, ta lai ashi.

Senden nungsa linük tesem ajunga nung tetsür arishi küm 14 tain ajunga atema February 28, 2026 nü HPV Vaccination Campaign tenzüksü, koba Ato Kilonser-i Ajmer, Rajasthan nungi virtual yimya nung tenzüksütsü sentong lir ta metetdaksü.

Dimapur district nung iba campaign ya March 2, 2026 nü shimteta aliba health facilities nung tenzüksü.

BILEMDANGANG

"Na pela alitsü atema dangar dak teimla."